

Plaschair e satisfacziun

Regenza vul promover il rumantsch e talian cun in post da coordinaziun

DAD ANDREAS CADONAU/FMR

■ **Bler consentiment da deputadas e deputads ha la regenza grischuna retschavi per sias strategias per mantegnair a lunga vista lingua e cultura rumantscha e taliana. La regenza ha stipulà quellas strategias en il program guvernamental discutà ier en il cussegl grond.** Da satisfacziun han divers deputads e deputadas da lingua rumantscha e taliana discurrì il mardi passà en il cussegl grond a chaschun da la debatta pertutgant il program guvernamental per ils onns 2021 en fin 2024. Ma er il represchentant dal Partenz, *Benno Niggli* (pbd Aschera), ha discurrì dad ina necessitad urgenta. La renconuschientscha è sa drizzada vers il punct 5.1 dal plan guvernamental che formulescha il basegn da nizegiar e vesair la plurilinguitad grischuna sco schanza. E promover ella per mantegnair lingua e cultura rumantscha e taliana a lunga vista.

In'idea concreta dal palpì: Stgaffir in post da coordinaziun entaifer l'administraziun chantunala per augmentar la preschientscha da las linguas talian e rumantsch per cuntanscher in'administraziun plurilingua. Il deputà *Lorenz Alig* (pld Foppa) è sa drizzà vers il plenum sco pledader da la gruppa rumantscha dal cussegl grond ed ha exprimì ses plaschair. Ord sia vista èsi impurtant ch'il post da coordinaziun retschaiava valur e forza. Uschia stoppia quel post vegnir installà sin nivel departamental e sche pussaivel esser integrà en la chanzlia statala. Alig ha cità en il cussegl grond la favella da Gia-

cun Hasper Muoth e ditg ch'i na saja betg mo da defender la lingua rumantscha, tant pli necessari saja da «detschart prender il dretg». E quel dretg da renconuschientscha vers las linguas minoritaras stoppia era surpassar l'administraziun e cuntanscher las instituziuns affiliadas al chantun, p.ex. instituziuns turisticas ubain spitals. Instituziuns che vegnan per part finanziadas dal chantun. En quel cas, uschia Alig, na saja betg da dubitar che la Ruinaulta restia Ruinaulta. Per il president da la cumissiun predeliberanta dal plan guvernamental, *Bruno Claus* (pld Cuira), è la dumonda fundamentala, nua plazzar il post da coordinaziun, v.d. en tgenina partiziun administrativa. Claus ha bain renconuschì il dretg da la regenza da decider en atgna cumpetenzza questa dumonda. El ha dentant fatg attent al giavisch dal cussegl grond ed a la necessitad da plazzar il post entaifer la chanzlia statala per che la coordinaziun linguistica retschaiava la valur necessaria.

Fatg attent a l'atgna cumpetenzza

Fitg interessà ha il cusseglier guvernativ *Jon Domenic Parolini* persequità la debatta, sco ch'el ha ditg vers il plenum. El è da l'avis ch'il vast sustegn exprimì dal cussegl grond levgieschia e sustegnias las stentas da la regenza per rinforzar las linguas minoritaras. Parolini ha dentant fatg attent a la cumpetenzza da la regenza da plazzar il post da coordinaziun. Ed el ha visà ad autras instituziuns chantunales che lavurian sur divers departaments, sco per exempel l'uffizi d'informatica, da persunal u il post da stab per l'egualitad



Suenter la festa da 100 onns Lia Rumantscha a Zuoz è ussa dumandada la politica. Per promover las linguas minoritaras en il chantun vul la regenza tranter auter stgaffir in post da coordinaziun.

FOTO LIA RUMANTSCHA

da las schanzas. Parolini ha exprimì la prontadad da la regenza grischuna d'evaluar las pussaivladads da pretender re-

sguard da las instituziuns affiliadas vers ils basegns linguistics. Per exempel via ils mandats da prestaziun.

Applitgar la lescha da linguas

■ (fmr/ac) La Lia Rumantscha è medemamain satisfatga dal resun dal cussegl grond sin las propostas da la regenza. Tenor il parairi dal secretari, *Martin Gabriel*, lubeschia in post da coordinaziun dad applitgar la lescha da linguas. Impurtant saja che quel post retschaiava la valur necessaria entaifer l'administraziun. Per exempel ha numnà Gabriel las fusiuns da vischnancas. En in

tal project possia la Lia Rumantscha sulet far attent da resguardar las premisas legalas. In post da coordinaziun entaifer l'administraziun avess tenor el en tals cas tut in'otra valur e cumpetenzza d'intervegnir. Medemamain vesa il secretari da la Lia la pussaivladad da pretender resguard da las linguas minoritaras dad instituziuns publicas sco per exempel spitals.